

Sauti ya Mchungaji wa Kweli

Kazi njema nyingi nimewaonyesha, zitokazo kwa Baba; kwa ajili ya kazi ipi katika hizo mnanipiga kwa mawe?—Yohana 10:32.

Yesu alijitangaza Mwenyewe kuwa mchungaji wa kweli, kwa sababu aliutoa uhai Wake kwa ajili ya kondoo. Anasema, “Ndiposa Baba anipenda, kwa sababu nautoa uhai wangu ili niutwae tena. Hakuna mtu aniondoleaye, bali mimi nautoa mwenyewe. Nami ninao uweza wa kuutoa, ninao na uweza wa kuutwaa tena. Agizo hilo nalilipokea kwa Baba yangu.”

Yesu aliyasema maneno haya wakati kundi kubwa la watu wakiwa wanasikia, na mguso wa kina uliigusa mioyo ya wengi waliosikiliza. Waandishi na Mafarisayo walijawa na wivu kwa sababu alipendwa na watu wengi.... Alipokuwa akijiwasilisha Mwenyewe kuwa Mchungaji wa Kweli, Mafarisayo walisema, “Ana pepo huyu, tena ana wazimu; mbona mnamsikiliza?” Lakini wengine waliibaini sauti ya Mchungaji wa Kweli, na wakasema:

“Wengine wakasema, maneno hayo si ya mtu mwenye pepo. Je, pepo aweza kuwafumbua macho vipofu? ... Naye Yesu alikuwa akitembea hekaluni, katika ukumbi wa Sulemani. Basi Wayahudi walimzunguka, wakamwambia, Hata lini utatuhangaisha nafsi zetu? Kama wewe ndiwe Kristo, utuambie waziwazi. Yesu akawajibu, lakini ninyi hamsadiki.... Kondoo wangu waisikia sauti yangu; nami nawajua, nao wanifuata.... Mimi na Baba tu umoja.”

Kwa uthabiti na nguvu gani Alitamka maneno haya. Wayahudi walikuwa hawajapata kamwe kusikia maneno kama hayo kutoka kwenye midomo ya wanadamu, na mvuto wenye kusadikisha uliambatana nayo; kwa maana ilionekana kuwa utukufu wa Mungu ulionekana kwa wanadamu Yesu alipokuwa akisema, “Mimi na Baba tu umoja”.... Yesu aliwatazama kwa utulivu na pasipo kunywa, na kusema, “Kazi njema nyingi nimewaonyesha, zitokazo kwa Baba; kwa ajili ya kazi ipi katika hizo mnanipiga kwa mawe?”

Mkuu wa mbinguni alisimama, kwa utulivu akiwa amehakikishiwa, kama Mungu mbele ya watesi Wake. Nyuso zao zenye kukunjamana, mikono yao iliyojaa mawe, haikumtisha. Alijua kwamba majeshi yasiyoonekana, majeshi ya malaika, yamemzunguka, na kwa neno moja kutoka katika midomo Yake wangeupiga umati kwa fadhaa, kama wangejaribu kumtupia hata jiwe moja. Alisimama mbele yao bila woga. Kwa nini mawe hayakutupwa kwa mlengwa? Ilikuwa ni kwa sababu utukufu wa Mungu uliangaza kupitia kwa ubinadamu, na walipokea ufunuo, na kuthibitishwa kwamba madai Yake hayakuwa ya kawaida. Mikono yao ikatulia na mawe yakaanguka ardhini. Maneno Yake yalitangaza Uungu Wake, lakini sasa uwepo Wake binafsi, nuru ya macho Yake, ukuu wa msimamo Wake, yalitoa ushahidi kwa ukweli kwamba Alikuwa Mwana mpendwa wa Mungu

(The Signs of the Times, Novemba 27, 1893).